

2PE -
2 Pedro

Xroon yóxin tsíkjin Pedro

1

Ch'in Pedro chr'éhen ch'an xroon ti sin tinkáchónki Cristo

¹ Janhan Simón Pedro, t'ahá ixrā Jesucristo. Mé ikjian ti xroon í ts'ayéhéra kixin ó tinkachónkira Ìnchéni éxi tinkáchónkini kixin imá jína Díos la ko Jesucristo, ti nkexro tsaáxini. ² Díos sintañaora la ko tjaon kjuaxróxin kixin ó choxinra nkexrín itjen Díos la ko Ìnchéni Jesús.

Jina chrók'uejó ti sin tinkáchónki Jesús

³ Díos kjuajon kjuachaxin tsochóntani kaín ti nkehe tichánxihini kixin chrók'uejóni jína éxi tjinkaon ch'an. Kjuajon ch'an kaín tíha ti ó kjuako ch'an nkexrín itjen ti nkexro k'uéyehē ti jeheni kixin ts'ejokoni ch'an ti itjen ti kjuachaxin ijié chóna ch'an. ⁴ Mé xikaha kjuajon ch'an kaín ti nkehe imá tjetoan la ko imá tjete, kixin chrók'uayehéra kjuachaxin la chrók'uejora jína éxi jehe ch'an la ko chrókuītōhéra ti nkehe jínahña siín chjasintajni. ⁵ Méxra tinkachónkira Ìnchéni la chrókjuéyára kixin chrók'uejora nkojína; ndá ti tjejora nkojína ndá chrókónohara nkexrín itjen Díos; ⁶ ndá ti chrókónohara ndá chrókjuachara chrókjuenkayáxinra jína la ko jína chrók'uetuehén asánra; andá ti tjenkayáxinra jína ndá chrókjuachara chrókónínkakhñara tjoka; andá ti tónínkakhñara tjoka ndá chrókjuachara chrókjuínchexiteyéhera Díos; ⁷ andá ti chaxín nchexiteyéhera Díos la chrókjuachara chrótjuéhéra kíchuára; ndá ti tjuéhéra kíchuára la chrókjuachara chrótjuéhéra kaín chojni.

⁸ Andá ti xikaha tjejoch'era la tinkák'ánkí ti kjuaxrexinkaon kuéntara, la jehya ó chónko kuitekaonra Ìnchéni Jesucristo.

⁹ Andá ti nkexro tjejónchexiteyáhya tíha la éxi ijnko chojni

t'ikonhña o ijnko chojni t'ikonhña ikjín, kixin ó k'uitjáñenhen sin kixin Ìnchéni ó kjuínchetjóá ch'an ti iije kuéchónta sin. ¹⁰ Méxra kíchoni, nkojína chrók'uejora ndá chaxín tsonohara kixin Díos tsíkjeýá ti jahara la ko tsík'éyáhara ch'an. Ti xikaha tjákoxinra la xitjahya tsitsínkara. ¹¹ La Díos tsojtahára kjuachaxin ts'ixehenra ti itjen Ìnchéni Jesucristo t'etoan nkochríxín, jehe ch'an mé ti nkexro kjuínchekaá ti jeheni.

¹² Méxra janhan titoahya ntaxráxinkáonra kaín tíhi, kjónté ó nohara ti nkehe chaxín, la ko jína tjejora éxi ti nkehe xrákojara seno. ¹³ Ndáxrjan kixin jína chrókjuíntaxráxinkáonra kaín ti nkehe í, ti naxa itjén ntihi chjasintajni, ¹⁴ kixin Ìnchéni Jesucristo kjuínchenóna kixin í séhya ndá its'én janhan. ¹⁵ Méxra ntaxráxinkáonra kaín tíha kixin ti ó its'én la jahara tsoxráxinkáonra nkochríxín kaín ti nkehe kjuákojara.

Ti sin k'uikon ti kjuachaxin kuènte Cristo

¹⁶ Ti nkehe kjuákojara kuènte ti kjuachaxin ijié chóna Ìnchéni Jesucristo la ko ti nkexrín tsokjan ch'an la jehya ijnko cuento kjuích'éñani chrókjuít'ayahínra. Nahi. Ikuan k'uíkonxían Ìnchéni la ko ti kjuachaxin ijié chóna ch'an. ¹⁷ K'uíkuan tíha ti ó It'éni Díos kjuikosáyehe ch'an ti Xjeen ch'an, la kujhan nixja Díos itjen nkaya nkajní ndáchro: “Tíhi mé xjana imá tjuahá la ko chána kixin itjen ch'an” ¹⁸ Mé xikaha kujhan ti itén Díos kujxin nkaya nkajní ti ó kjuak'ekjan Ìnchéni chrítaón ti ijna tjóá.

¹⁹ Mé xikaha noexíni kixin chaxín ndoá ti nkehe chrónka ti sin tsíkjin itén Díos ose. Méxra chrókuihínra jína ti nkehe kuéndáchro sin kixin ti itan mé éxi ijnko xrohi t'inkaséñaxín ti sítie hasta tsjixrakájnia ti ñao ts'inkaséña ti ó itsi ti konotsé t'inkaséñaxín ti nchítjen la tíha ts'inkaséñaxín asánra. ²⁰ Méxra imá tjetoan kixin chrókónohara tíhi: kixin ninkehó ti xroon itén Díos tsík'óna, la jehó chojni chrókjuacha chróchrónkaxin ti tan i. ²¹ Nahi. Ti nkexro kuéchrónka itén Díos la nixjahya sin ti nkehe jehó sin kjuenkayáxin sin. Nahí. Jehe sin imá kuínkachónki sin Díos andá ti Nchakuen Díos kjuinkítsa nixja sin ti itén ch'an.

2

Ti sin tjako ti nkehe nduáhya

(Judas 4-13)

¹ Kjaxin óse kuék'íxin chojni nduáhya kuéchrónka itén Díos ti chjasin Israel, éxi ijie ts'ixin maestro sit'ayahara. Jehe sin tsochr'ákjenhen sin nkehe nduáhya ts'itjáñaxín ti nkehe chaxín nohara, la xikaha tsitekakohnhãra Ìnchéni ti nkexro tsaáxinra. Tíha mé tsjixin ti ts'itjáñaxín sin. ² Nchónhña chojni tsochréhe ti nkehe jínahña tjakoxin sin la xikaha ts'ántaxíenxín chojni ti ntia ndoá kuènte Ìnchéni. ³ Jehe sin imá tsoxrjínhìn sin tsochónta sin itsjé chichaon, la xikaha tsjanchahara sin chichaon kixin ti nkehe nduáhya tsjako sin. Kjáncho ti nkehe ts'itjáñaxín sin la ósé tjechónhen la kohya nkexrín tsaá sin.

⁴ Méxra Díos, la kjónté ti sin ángel ti ó kjuasin ijie la kuikonóehña ch'an, la k'uetóan ch'an kixin tsjasóte sin, la sakjuí sin ti sítie ts'ejóchjína sin, la ntiha tjejóchrexin sin cadena tsjixrakájña ti ñao tsitoxén ijíee sin. ⁵ La ko kuikonóehña Díos ti sin k'uejó chjasintajni ose la ichr'án ch'an ichrin la kujtee ìnta ti sin jínahña, la jehó kjuínchekaá ch'an Noé, ti nkexro kjuako ti itan jína la ko yato chojni ó. ⁶ Kjaxin kjuínchek'itjáña Díos ti chjasin Sodoma la ko Gomorra, iché hasta k'óna nteso, kixin xikaha chrókónohe kaín ti chojni jínahña ts'ejó chr'éxin kixin kjaxin sin tsjasóte sin.

⁷ Kjánchó Díos kjuínchekaá ti ch'in Lot, ijnko chojni jína, la kóxakonhen ch'an ti k'uikon ch'an ti ijie kjuasin ti sin jínahña.

⁸ Ch'in Lot, ti nkexro jína asén, mé kjuak'e ch'an ti siín ti sin jínahña la kaín ñao k'uává asén ch'an kixin k'uikon ch'an la ko kuíhin ch'an ti nkehe jínahña ich'e sin. ⁹ Méxra Ìnchéni la nohe nchekaá ti sin kaín asén titekaon ti jehe ch'an, kjónté nchónhña nkehe náxrjónhña ts'átsínka sin. Andá ti sin jínahña la sinchekjasóte ch'an ti ñao tsitoxén ijíee chojni.

¹⁰ Díos sinchekjasóte ti sin nchexiteyéhe ti nkehe jínahña ndáchro asén sin, andá nchexiteyèhya sin ti nkehe t'etoan Ìnchéni. Titekakohnhã sin la ko chrakonhña sin chrók'uantaxínhìn

sin ti sin ángel chón̄ta kjuachaxin. ¹¹ Andá ti sin ángel, kjónté imá tsehe sin la ko chón̄ta sin kjuachaxin, la tjanchehya sin Inchéni kixin sinchekjasóte ti sin jínahña.

¹² Andá ti chojni a, la éxi iko tjenkayáxinhña sin la nchexiteyéhe sin ti nkehe ndáchro asén sin, la jehó kokjíhi sin kixin sich'e sin ti nkehe jínahña, andá íso chojni tsotsé ti jehe sin la ts'óñá sin, its'en sin éxi ijnko iko xikaha. ¹³ Mé xikaha tsjasóte sin kixin jehe sin kjuínchekjasóte sin íso chojni, la tóxrjínhjn sin sich'e sin ti nkehe ndáchro asén sin kjónté t'ikon kaín chojni. Ijnko kjuatósùehe kixin tjejóntaxínra ntekoara sin ti kia, la kjónté xikaha, naxa tjasin sin ije.

¹⁴ Ti o t'ikon sin nkojín chojnichjin la tjinkaon sin chrókjuasinko sin ije. Ch'iyehé sin ti sin noehña la imá tjinkaon sin tsochón̄ta sin kaín ti nkehe ndáchro asén sin. La xikaha imá tjasin sin ije, méxra chaxín tsjasóte sin. ¹⁵ Kuítóhe sin ti ntja ndoá la chréhe sin ti ntja kuènte Balaam, xjeen ch'in Beor, kixin kóxrjínhjn ch'an chrókjuacha ch'an nchónhña chichaon kixin ti nkehe jínahña kuékjich'e ch'an. ¹⁶ Ntá ijnko kolócho chjin xitjahya nixja la nixjaxin itén chojni la xrenduéhe ti ch'in Balaam kixin ti ije chón̄ta ch'an, ndá kuitóhe ch'an ti nkehe kjualontj chrókjuich'e ch'an.

¹⁷ Ti chojni nduahya tjako i la éxi ijnko tòye tjiáhya inta la ko éxi itji sátjiko xrinto ó. Ó kjuixin kuituexín kixin sátsji sin ti antsí sítie, tsjasóte sin nkochríxín. ¹⁸ Kixin nixja sin kaín nkehe jínahña la ko sinkíhya, imá tjasin sin ije la tóxrjínhjn sin chojnichjin ókjé, ndá xikaha tjachroexín sin ti sin nantá tjinkaon chrókuitóhe ti nkehe nduahya. ¹⁹ Chrónka sin kixin chón̄ta chojni kjuachaxin sich'e kaín nkehe, kjánchó jehe sin jehó nchexiteyéhe sin ti nkehe jínahña; méxra ti nkexro xitjahya tsitóhe ti ije la ti ije mé t'etuēhen ti jehe sin. ²⁰ Ti nkexro ó chóxin Inchéni Jesucristo ndá kuitóhe sin ti nkehe chrók'uitjáñaxín sin chróxin chjasintajni, andá chr'éxin chrókuakja sin ti ntja jínahña ínaá, la chrókjuacha ti jínahña chrókjuachroe ti jehe sin, andá antsí náxrjónhña chrókóhen sin ke ti senó. ²¹ Ícha jína chrókónoehña sin ti ntja jína, ke ti ó nohe sin ndá tsitóhe sin ti nkehe k'uetuan Díos. ²² Ti xikaha la jehe sin nchexiteyá sin ti kjuaxrexinkaon jína ndáchro: “Ti konja t'okjan la

xikjan inie ti nkehe t'ókjan, la ko ti kochíno nantá tsík'ónti, ikjan tikjíankí nchet'o."

3

Ti ñao tsokjan Ìnchéni la í sehya

¹ Kichoni imá tjuahara, la tíhi ti xroon yóxin ikjian ts'ayéhéra. Yóí ti xroon la ntaxráxinkáonra kixin jína chrókjuenkayáxinra.

² Xraxinkáonra ti nkehe tsíchronka ti sin kuéchronka itén Díos óse la ko ti nkehe k'uetooan Ìnchéni, ti nkexro tsaáxini, kjuako ti sin tsíkjejá ch'an.

³ Tjinkavan chrókónohara kixin ti ñao tsjixixín la itsi chojni tsjanoá ti itan jína kuènte Ìnchéni, la sich'e sin kaín ti nkehe jínahña ndáchro asén sin. ⁴ La tsjanckankí sin nkehe kóhen ti ndáchro Cristo kixin tsokjan ch'an, kixin ndesi ik'uén ti sin k'uaxrjeníxini la naxa xikahó sítóhen éxi ndesi ti k'óna chjasintajni, tsixro sin. ⁵ Ti chojni a la titekakonhña sin kixin ose jehó nixja Díos la k'óna ti nkajní la ko chjasintajni, la sákjui ti ìnta okjé ndá kuitohe nonte xámá. ⁶ Andá ti ìnta mé k'uitjáñaxín chjasintajni la kjuatjoá sin. ⁷ Andá ti nkajní la ko ti chjasintajni chóxini ijie, mé tjejóchónhen tsochexín xrohi ti ñaon tsjixixín kixin xikaha k'uetooan Díos, ti ó tsitoxén ijíee chojni la ko kaín ti sin jínahña tsjasóte sin.

⁸ Méxra kichoni, chrók'uitjáñahñara kixin Ìnchéni la ijnko ñao la t'ikon ch'an éxi mil nánó la ko mil nánó mé t'ikon ch'an éxi ijnko ñao ó. ⁹ Ìnchéni la í sehya ndá sinchexiteyá ti nkehe tsíndáchro, la jehya éxi tjenkayáxin íso chojni kixin ó imá isé tjejóchónhen sin. Nahi. Tjexónhen ch'an kixin ninkexró chrók'uitjáñahña, kixin tjinkaon ch'an kixin kaín chojni chrókjan sin chrókuinkachónki sin Díos.

¹⁰ Kjáncho ti ñao tsokjan Ìnchéni la itsi éxi xíchee xikaha. Andá ti nkajní la ts'itjáña, la nchónhña kjuachakon ts'ixin, ts'ixin kjonta nkajní la kaín ti nkehe siín nkajní la ts'itjáña, tsoche la ko ti chjasintajni la tsoche la ko tsoche kaín ti nkehe siín ntíhi.

¹¹ Méxra ti xikaha tsohen ts'itjáña kaín nkehe, la jahara antsí jína chrók'uejora chrókuinkachónkira Díos. ¹² Chrók'uejochóhénra ti

ñao itsi Díos la chrókóxakohanra chrók'uejora jína chrókjuich'era ixra kuènte Ìnchéni kixin tjoka chrókui ch'an. Ti ñao a la ts'itjáña nkajní, tsoche, la ko kaín nkehe tsatanka kixin tsochexín ti xrohi a.

¹³ Andá jeheni t'ejóchónheni ti nkajní nixin la ko ti nonte nixin éxi tsíndáchro Díos tsjajon ch'an. Ntiha la imá náxrjón la ko kjuaxróxin ts'ejó ti chojni jína.

¹⁴ Méxra kíchoni, ti naxa tjejochonhénra kixin itsi ti ñao a, la kaín asánra nkojína chrók'uejora kixin ts'ikon Díos kixin kjuaxróxin tjejora, chontahyara ninkehó ijie. ¹⁵ Chrókónohara kixin naxa tjechónhen Ìnchéni, tjokahya itsi ch'an kixin naxa íso chojni chrókuitekaon sin ch'an. Kjaxin xikaha tsíkjin kíchoni Pablo ti xroon chr'ahánra ch'an éxi ti kjuachaxíen Díos k'uayéhe ch'an.

¹⁶ Kaín ti xroon tsíkjin ch'an la nixja xikaha, kjánchó iso tíhi la imá ixra tienxíni. Andá ti sin noehña la ko ti sin kánhño tinkáchónki Ìnchéni la tienxínhña sin, ndá nduáhya tjako sin nkehe t'axrjexín ti nixja ti xroon tsíkjin ch'an, la ko kjaxin nduáhya tjako sin íso nkehe nixja xroon itén Díos. Ndá xikaha jehó sin tjejá sin ti nkehe ts'itjáñaxín sin.

¹⁷ Méxra kíchoni, ó nohara tíhi, ndá chrókóxakohanra kixin chrókjuachroehyara ti kjuach'ia xriko ti sin jínahña, la chrókuiŋtoéhyara ti nkehe jína tinkachónkira. ¹⁸ Ícha jína antsí chróchoxinra Ìnchéni Jesucristo, ti nkexro tsaáxini la ko antsí chrók'uánkí ti tjehéra kíchora. Méxra tsjikosáyeheni ch'an ijie la ko nkochrín. Mé xikaha tsohen. Ó tjen.